

東
華
續
錄

東華續錄

咸豐三十二

臣王先謙敬編

臣陶澐宣恭校

二月辛未諭內閣浙江巡撫黃宗漢自簡任以來辦理各路防堵不動聲色措置裕如督辦漕糧海運亦極認真上年剿捕台州及杭州之昌化於潛並甯波各處匪徒與見在嘉湖兩屬聚眾抗糧匪犯均能立時擒獲辦理甚屬妥速地方悉臻安靜歷覽該撫奏報精詳之至毫無瞻顧深堪嘉尚著發去朕書忠勤正直扁額一面賞給黃宗漢該撫朕所賜御書不必作獎勵觀作紀實觀朕尤願汝慎終如始以成一代之名臣○諭軍機大臣等葉名琛柏貴奏紅單船隻見在分別趕修添雇一摺前因紅單船隻在福建廈門剿匪損壞准令回粵修理並諭葉名琛等責成紳士伍崇曜

等寬爲雇備由海道駛入長江助剿茲據該督等奏續經雇募船
二十三隻連修理各船十九隻共四十二隻於二月初旬儘數啟
程見在已屆仲春南風漸轉諒已剋日放洋卽著仍派陳國泰吳
全美管帶此次船隻較多一切駕馭彈壓必須專派大員方資得
力著葉名琛於該省水師總兵副將內擇其熟悉洋面情形剿捕
素稱勇敢者酌派一二員統帶前往務於春間悉數駛抵大江不
准沿途逗遛耽誤其分起管帶之備弁各員亦著認真遴選軍火
器械尤當寬爲籌備毋致中途缺乏至蘇廷魁旣不能管帶師船
卽著毋庸前往仍責令該員會同伍崇曜龍元僖等籌勸經費以
資協濟將此由六百里諭令知之○諭前因河南陳州等處捻匪
滋擾降旨令英桂飭牛鑑與徐廣縉協帶兵勇馳往掩捕本日據
牛鑑奏已卽署臬篆挑選壯勇五六百名隨帶捐備礮位刀械之

紳士宋玉瑾等前往會勦其應領餉稍等項卽由勸捐局內捐輸
項下提用均著照所奏辦理飭令趕緊將各股捻匪悉數殲除毋
令滋蔓惟牛鑑係賞給五品頂帶之員不應自行奏事著英桂傳
諭該員嗣後勦匪情形有應行入奏者均著由該撫代爲轉奏以
符體制將此由五百里諭令知之○葉爾羌參贊大臣德齡奏報
喀什噶爾回子承襲金頂報聞又批朕聞汝在葉爾羌地方於前
歲有建立生祠之事又聞有彼處兵民潛除汝像之鬚剔除眼睛
之事著一一明白回奏稍有不實必將汝從重治罪○以廣東捐
輸軍餉永廣南海縣學額四名順德新會各一名○壬申山西巡
撫恆春遵旨另奏各官考語得旨凡屬員之賢否自有定評是則
是非則非今觀汝單中有五人考語末語皆註尙堪供職是何言
耶堪供職自應畱任不堪供職自應罷斥以一摸棱之語豫存立

腳地步殊屬非是可見汝平日並未留心著將汝單中所開尙堪供職之五人有無別項劣蹟及別有片善可取之處一一詳細密奏看汝此次所出考語固比前次差勝然所謂尙堪供職之人考語內尙有不實不盡汝密奏來惟朕一人知之向來各省密考雖樞務之王大臣猶不得豫聞又奏請以朔平府知府祥奎調署太原府知府批俟祥奎到任復畱心察看以地方爲重不准遷就朕因祥奎外任未久故飭汝畱心若實堪勝任亦不准因有硃批故意參劾○以進攻黃州失利革提督佈克慎職仍命隨同台湧帶兵征剿○癸酉諭軍機大臣等英桂奏賊氛逼近豫疆南路情形喫重該撫暫駐汝郡籌剿並嚴防交界一摺所奏甚合機宜據稱六安州城亦探聞被匪竄擾皖豫交界處所必須嚴密設防其湖北黃州賊匪直撲漢陽勢甚猖獗河南信陽羅山等處防範尤不

可稍疏該撫見駐汝陽以爲各路應援仍當體察情形相機前進並隨時知會台湧督飭將弁互爲聲援以期力遏賊氛武昌省城該匪是否竄逼著卽確探馳奏本日據張之萬奏歸德陳州一帶辦理團練請統歸署太康縣知縣祝塏經理以牛鑑徐廣縉總其成等語各州縣團練鄉勇原以助兵力之不足該署縣祝塏如果民情愛戴俾令統辦皖豫交界各處團練必能得力著該撫察看該員並酌量地方情形妥速籌辦張之萬摺著鈔給閱看將此由六百里加緊諭令知之○諭武昌爲省垣重地距漢陽僅一江之隔賊匪竄踞漢陽勢必擾及武昌崇綸青麐守禦省城情形甚屬危急唐樹義礮船究在何處逗遛吳文鎔是否查有下落省城待援甚急實深懸繫台湧接奉此旨著卽督催官兵相機進剿並將近日賊蹤動靜及武昌情形迅速奏聞仍著隨時知會英桂柏山

等於楚豫交界處所聯絡聲勢力挫賊鋒遏其北路其荆襄一帶仍當隨時兼顧督飭員弁嚴加防守佈克慎見退至孝感一帶地方已有旨將該員革職令其隨同該將軍帶兵進剿其潰散兵勇應如何分別收集並著妥籌辦理無誤事機將此由六百里加緊諭令知之○乙亥以安徽六安州城失守提督和春巡撫福濟總兵官音德布下部議處○丙子諭軍機大臣等張亮基奏渡口接運官鹽派員監運一摺官鹽運銷關繫國課民食自應亟籌妥辦惟當此防河喫緊之際若稽查稍有不力必致奸匪潛迹其間見在獨流潰竄餘匪仍踞東城村一帶而皖省賊勢方張尤不可不豫籌防堵張亮基請於曹州屬之董家口設小船十隻每日接運官鹽南北兩岸人夫均不准過岸並責成委員李天錫監運卽照所議妥爲趕辦但不准拘定四十日之限總以迅速運竣爲要儻

不肖員弁不能實力稽查甚至胥吏營私潛行竄放務卽隨時密查嚴辦其尋常販運煤米船隻仍著一概收集毋令奸匪乘間偷渡王履謙巡河是其專責長臻職司總河英桂張亮基身任地方均屬責無旁貸著懍遵節次所奉諭旨督飭各該委員及地方武營汛認真巡緝不准稍涉疏虞儻再有賊蹤闖入情事國法具在豈能倖逃將此由五百里各諭令知之○丁丑 上御經筵○諭軍機大臣等易棠奏番族飾詞投誠西甯辦事大臣姑允所請以致番族效尤偷渡見在設法招撫一摺蒙古番族游牧各有界限歷年以來野番潛住河北屢滋事端早應逐令回巢以安邊圉乃該辦事大臣吳必瀄輒聽偷渡河北之拉安族番飾詞投誠藉護送堪布之名欲在河北住坐且有不准投誠照舊爲匪之語情詞桀驁顯係有挾而求吳必瀄毫無定見輒允所請實屬謬妄糊

塗該督見已移咨吳必瀆飭令駐防副將及青海兩翼盟長等將
偷渡河北番族相機逐令回巢自應如此辦理至吳必瀆所稱非
稍需兵力不足以杜邊釁等語見在該番族並未滋事何得率請
用兵著易棠卽飭令該廳營督率千百戶將偷渡之都受族等番
子招集回巢並曉諭各番絕其妄念仍飭令駐防副將及該盟長
等設法驅逐務使消患未萌毋任別生枝節將此由五百里諭知
易棠並諭吳必瀆知之○予安徽廬州殉難布政使劉裕鈐祭葬
世職諡勤壯知縣張文斌祭葬世職○戊寅祭 大社 大稷○
諭軍機大臣等僧格林沁勝保等奏逆匪受創以後仍堅匿不出
連日設法進擊以圍爲攻一摺逆匪竄踞束城等村已逾一月疊
次諭令該大臣等督飭官兵逼近賊巢痛加剿洗數日未見奏報
焦急殊深乃細閱本日奏到各情竟稱該逆死拒不出調到大礮

僅轟塌屋宇該逆仍乘夜撲擾各路營盤我兵屢次進攻皆有傷折見在惟有挖濠樹柵待其自潰並請暫寬時日等語此股竄匪該大臣等若早能於奔突未定之時乘機協剿何至遷延至此尙不能埽穴擒渠乃日久布置仍似此敷衍入奏並未立有尺寸之功自問於心能無愧乎刻下大礮已到東北西北挖濠已竣西南東南兩路亦皆設法堵截著卽督率各路官兵趕緊進攻斷不准以冰雪皆融泥淖難進爲詞再延時日該大臣等屢經嚴旨飭催若不及早奏功國法豈能再宥所有打仗陣亡之鑲紅旗護軍校景文著交部議卹將此由六百里加緊諭令僧格林沁勝保等知之○琦善奏瓜州擊賊獲勝請飭帶艇船之總兵葉常春等緊扼江口得旨覽各情均悉此次尤爲出力者查明保奏葉常春李德麟周士法均革去頂帶以觀後效如再有藉詞觀望之處卽先行

正法順便奏聞又奏宿遷緊要駐兵毋庸調往他處批著照所擬軍營總貴事權歸一焉能事事請旨慧成父子口若懸河藉效忠之名實止自衛而已○僧格林沁等奏賊匪竄匿東城村設法圍攻情形得旨數日未聞軍報卽覺煩悶難堪今早忽接軍報以爲必可得手及細閱情形仍屬敷衍若不趕緊滅盡何日是了又藉口冰雪皆融若早能殲滅焉致今日之費力斷不能再寬時日○己卯諭內閣裕誠等奏會審案內擬罪失當遵旨另議一摺此案已革刑部主事王式言於承審命案聽受請託失入絞罪且與說事之張五見面並有該革員家人受賄確供其爲得贓枉斷毫無疑義可惡之至王式言著發往新疆效力贖罪會審此案之大學士裕誠侍郎愛仁並刑部尙書德興署左侍郎基溥左侍郎李鈞署右侍郎常志李道生於王式言聽屬妄斷各重情既經訊出並

不從重定擬輒行含混具奏裕誠德興基溥李鈞常志李道生均著交部議處愛仁著交都察院議處刑部尙書許乃普前因王式言係伊門生奏請回避未允所請復有旨諭令該部將實情審出寬其失察之罪若故意開脫必當加等治罪許乃普豈不知例案輕重於王式言初斷罪名錯誤並未察出經朕疊次訓諭應如何秉公定擬力除積習乃於此案供情處處爲王式言開脫地步實屬有心回護許乃普卽著革去尙書降補內閣學士毋庸在南書房行走以示薄懲在逃之要犯張五英五等仍著步軍統領衙門順天府五城一體嚴拏務獲究辦餘著照原擬辦理○諭刑部奏巡撫應奏事件徑行咨部與向辦章程不符一摺向例各直省辦理情罪重大之案一面正法一面專摺奏聞茲據該部奏貴州巡撫蔣霽遠於審辦盜匪王抱鸞等聚眾疊劫殺人重案徑行咨報

刑部並未專摺具奏與向辦章程不符蔣霽遠著交部議處○諭軍機大臣等怡良許乃釗奏轟塌上海城垣並連日獲勝情形一摺此次進剿將弁如虎嵩林秦如虎等皆能奮勇爭先身受重傷實屬出力據該督撫所奏逆匪接濟已斷傷斃甚多正可乘此聲勢剋期殄滅何以另片所陳尙稱兵力單薄慮其他竄此等烏合之賊圍攻數月猶不能悉數殲除轉以賊勢愈蹙圖竄益堅等詞豫爲地步實屬遷延玩誤許乃釗專辦此事日久無功已屬罪無可道若再不痛自振作趕緊克復城池儻嘉定等處竄出餘匪或有蔓延致令浙江海運漕糧稍有阻滯自問當得何罪怡良近在蘇州不能加緊督催亦難辭咎著該督撫於接奉此旨後迅卽督飭水路將弁合力進攻剋日克復上海將各股逆首盡數殲除不准稍畱餘孽此次出力將弁著准其酌量保奏見在上海未復無

可論功特因各該員等尙能不避鋒鏑准其酌保數員以爲奮勇者勸若稍有冒濫自難逃朕洞鑒陣亡之弁兵亦著查明照例請卹至江蘇海運事宜迄今未據奏報京倉支絀情形該督撫等豈未深悉見在已屆二月中旬何可再有耽誤著卽將見辦情形趕緊馳奏江蘇地方州縣疲玩蒙混積習已深該督撫不能嚴催趕辦已難辭咎若再不設法督催以速補遲朕必將該督撫治以貽誤漕糧之罪決不寬貸將此由六百里加緊各諭令知之○兩江總督怡良署江蘇巡撫許乃釗奏江蘇接濟金陵軍餉未能懸定得旨向榮在江南日久無功死有餘辜猶謂其聲威素著琦善在揚州獨力支持雖未能埽數廓清而北面實賴爲屏蔽尙百般造作蜚語以逞談鋒許乃釗止知有江南不知有全局止知有身家不知有國家眞可謂喪盡天良孤負朕恩且琦善同一軍營因何

未有一語提及近來張芾之事想汝已悉汝若再不知悛更甚於張芾之罪所請停撥之處著不准行若仍行瀆請必斷汝首○以朱鳳標爲刑部尙書周祖培爲左都御史翁心存爲吏部左侍郎已革尙書○庚辰諭軍機大臣等袁甲三奏土匪假充逆賊竄擾潁上蒙城見在籌剿一摺該匪等假充逆賊乘人心搖動之際肆意焚掠潁上蒙城兩縣疊被竄擾更難保非逆賊勾通故令先爲嚮導見在廬州未復六安又陷亟須將此股土匪迅速殲滅方不至該逆乘虛北竄見在臨淮防守聲勢尙不單弱該給事中將進駐臨淮鄉兵檄令折回並隨營練勇官兵卽著親自統帶馳往蒙城迅籌撲滅並探明潁上賊匪是否退出應如何分投攻擊俾該匪彼此不能相顧卽於和春等派來官兵內酌撥若干名分赴潁上剿洗其薩炳阿等所帶官兵駐紮臨淮亦著隨時知照互相策應惟

當相機妥辦萬不可令匪蹤闖入潁亳更滋蔓延如必須河南兵
勇前赴皖境夾擊著卽飛咨徐廣縉等遵照前旨帶兵應援以冀
南北兩路均有官兵迎剿可望迅速竣事據奏所募壯勇堪資驅
策該給事中正可乘其銳氣多方鼓勵殄除羣醜俟此股匪徒掃
蕩仍酌度何處緊急卽赴何處與和春等聲勢聯絡併力剿辦爲
要將此由六百里加緊諭令知之○袁甲三奏接據鐵里營剿匪
各員稟由雉河集迎剿時探聞匪首張大領等有匪徒三四千人
分頭埋伏空其巢穴以誘我兵之入該員弁等卽飛飭兵勇繞道
接伏至成福寺該匪突出一千餘人蠶擁前來參將朱連泰督率
河州兵居中首先開放槍礮外委孫永科督兵攻其左勇目劉倫
帶勇攻其右後路突出二三百人圍鈔我軍該兵勇奮勇攻擊力
戰兩時之久轟斃匪黨無數該匪往北逃竄追殺一百數十人偪

至渦河邊該匪撲水而逃自相擁踏淹斃甚多奪獲槍礮刀矛二百餘件是夜該匪復糾合五六百人潛來劫營我軍早已豫備飛催兵勇排隊隔河對擊鏖戰逾時該匪拌死不退鳧水過河縣丞徐曉峯領隊迎擊知縣顧思堯督催守備連丕甲等會剿並飛飭各鄉團練下河截擊立將渡河賊百餘名全行擊斃對岸之匪始行逃散我兵趕駕浮橋該文武等督率窮追三十餘里斃賊三百餘名生擒張奔等四十餘名臣查鐵里營張姓結捻爲匪已歷多年並有傳習邪教之事上年冬間該委員等擒殺百餘人此次復受大創乘此聲威不難掃除淨盡惟見因蒙城事急不得不將該兵勇調回爲併力會剿之計報聞○辛巳諭軍機大臣等前因羅惇衍奏請飭廣東採洋米接濟倉儲已諭令葉名琛柏貴妥速籌辦茲據戶部奏京倉支絀仍請飭各直省一律採辦據稱廣東洋

米福建臺米向來米多價賤兼有海道可通見值支放不敷自應急爲籌備著葉名琛柏貴卽遵前旨迅速購買米數十萬石並著王懿德購買臺米三十萬石均按照該省實在市價採買設法多備船隻趁風信順利之時運送天津其米稅船鈔均免徵收並准帶貨物二成免稅以期迅速動用何項卽著先行奏明作正開銷至捐輸米石辦有成案並著該督撫等悉心籌畫妥速辦理京倉關繫緊要毋得畏難推諉致誤急需將此由六百里各諭令知之

○諭據戶部奏京倉亟宜籌備請飭各省設法採買以資接濟一摺上年因運道梗塞曾經飭令奉天等省酌量採買是否辦有章程至今尚未覆奏京倉儲備支放攸關自應亟爲籌畫著盛京將軍奉天府兼尹府尹直隸山東河南各督撫於各該地方無論何項糧米設法採買一二十萬石迅速運至天津交局收買各省米

價均著照戶部所奏按照實在市價購買其關津米稅船鈔均著
免其徵收至採買價值卽各就本省悉心籌畫動用何項銀兩准
其作正開銷京倉開繫緊要此係萬不可緩之事該將軍等務須
實力奉行斷不可藉詞推諉至捐輸米石均有成案可循各該省
如有紳商捐輸米石著卽奏明一律辦理總期有益京倉不至虛
糜經費將此由五百里各諭令知之○諭崇綸青麐奏探聞總督
吳文鎔兵敗捐軀並賊船上竄各等語該逆飄忽靡常見在金口
漢口賊艘均已連檣上駛武昌情形稍緩而荆襄一帶萬分喫緊
自應先其所急酌撥兵勇前進與台湧聯絡聲威互相應援省城
防兵六千餘名加以魁玉所帶官兵一千名爲數尙多不得藉口
守城置上游於不顧著崇綸等迅速籌撥交魁玉帶往助剿仍一
面密爲布置扼其回竄武昌之路軍情變遷無定該撫等務當權

衡緩急統籌妥辦毋稍疏虞將此由六百里加緊諭令知之○諭
逆匪上竄荆襄一帶最關緊要台湧見授爲湖廣總督統轄全省
責無旁貸該督前駐德安此時情形較緩自應移兵荆襄一帶力
遏賊衝並隨時知照駱秉章曾國藩督飭兵勇合力夾擊飛催湖
南礮船迅速前進勿稍遲誤荆襄爲南北要隘斷不可令賊竄擾
官文已授爲荊州將軍與該督可以互相策應魁玉所帶駐防官
兵由武昌上援或令防守荊郡或令隨營剿賊並著該督酌量調
遣毋失事機將此由六百里加緊諭令知之○諭湖北賊勢猖獗
亟須遏其紛竄前調湖南之兵諒已啟程仍著駱秉章於交界處
所派兵嚴密設防杜其竄擾如須出境協剿卽著無分畛域嚴飭
帶兵員弁隨同台湧協力剿擊曾國藩統帶礮船想已開行著卽
兼程馳赴下游迎頭截剿此時水路進攻專恃湖南礮船遏其兇

欽務須趕緊前進勿稍延誤至礮船所需糧餉見據戶部奏稱湖南江西各省如有款可籌自當就近提用著曾國藩迅卽咨明各該撫酌量籌辦將此由六百里加緊各諭令知之○諭安徽已革廬州府知府胡元煒前經周天爵王茂蔭先後參奏各劣蹟本日復有人奏該革員練勇皆係班役中人及賊匪攻城勇皆逃走並風聞胡元煒有從賊等事胡元煒居官聲名狼藉前已有旨革職拏問如果城陷之後復甘心從逆實屬罪不容誅著和春等確切查明據實奏聞毋稍含混再昨據袁甲三奏該給事中練勇一千餘名並鄉民練勇五軍共得三千餘人頗堪備用見在和春福濟營中想亦有招募壯勇是否實係可靠不致奸匪溷迹其中著和春福濟袁甲三各將所募之勇查明確數具奏將此由六百里各諭令知之尋和春奏胡元煒所招練勇城陷時多半潰逃該員官

聲狼藉廬城失陷逃出難民僉稱其未死惟果否從賊並無確據

至臣等統帶之勇前招募時均有認保甘結不至奸匪溷迹報聞

○以台湧爲湖廣總督

由荊州將軍遷

曹楫堅爲湖北按察使

由湖南鹽法道遷

○緩福建各屬本年買補倉穀

○壬午諭內閣怡良奏請畱已革

運司辦理揚州撫恤善後事宜等語已革前任兩淮鹽運使但明

倫上年派令隨同楊殿邦在揚州辦理防堵嗣因賊擾揚城當將

該員革職發往新疆充當苦差仍暫畱清江浦辦理防堵戴罪自

效該革員自畱營以來並無出力之處該督輒藉詞紳士稟畱委

辦捐務其爲該革員夤緣差使豫爲免罪保舉地步已可概見但

明倫著卽行發遣所請畱於揚州差委之處著不准行所有揚城

勸捐撫恤及善後事宜著卽責成署揚州府知府存葆妥爲經理

儻不敷差委著該督添派道府大員幫辦已革漕運總督楊殿邦

與但明倫均係發往新疆充當苦差之員著一併卽行發遣不准
逗遛○僧格林沁勝保奏查逆賊被困情急乘初九日午刻大霧
迷漫捨命由小禮文向東南奔竄經善祿就近帶兵馳赴念祖橋
截殺該逆仍復堅拒我兵極力撲擊斃賊七八百名賊屍徧地順
隄由西南竄逸臣等乘夜追擊該逆直前狂奔行至邊馬橋偪令
鄉民用木搭橋偷渡我兵隨追隨殺及至河邊賊已過河將橋燒
斷臣等趕緊繞至臧家橋催令搭橋渡河該逆已竄入獻縣臣等
先後趕到乘其喘息未定極力攻擊該逆不敢踞城又向南門奔
竄計復斃賊數百名時已昏黑因兵馬連夜奔走百餘里暫令少
休臣僧格林沁先督馬隊追擊臣勝保一面尾督馬隊繼進一面
催調步隊接應總期窮賊所向盡力殄除又奏逆匪竄至獻縣經
達洪阿於西門迎擊斃賊一百餘名該逆退入城中復由南門竄

逸臣等督兵追及於善女橋前後夾擊至富莊驛地方賊屍枕藉共斃賊一千餘名生擒五十餘名該逆隨拒隨走到富莊驛村內設伏抗拒我兵實難撲進見已飛調步隊官兵一俟到齊即合力兜圍又奏查此次逆匪由束城村全股撲出副都統雙齡不能遏賊竄逸帶兵追擊亦無斬獲實屬無能已極相應請旨將副都統雙齡卽行革職以示懲儆又奏查本月初十日前任副都統達洪阿督帶馬隊官兵在獻縣城外將該逆隊伍衝斷擊斃逆匪一百餘名該員曾任二品大員臣等未便保奏可否量予恩施出自

聖裁桂良奏本月初九日亥刻賊匪向東南西南竄逸臣等飭該地方文武加意嚴防復據勝保咨稱賊匪大股由小禮文撲竄該大臣已親督官兵與僧格林沁分路鈔截該匪究係竄往何處一俟偵探明確卽行奏報上諭內閣達洪阿帶兵殺賊奮勇可嘉

著卽開復原官副都統雙齡不能遏賊竄逸帶兵追勦又無斬獲
無能已極著卽革職畱營戴罪自效○諭軍機大臣等逆匪竄踞
束城等村我兵圍攻已逾月乃本日據奏逆匪於初九日乘霧
由小禮文向東南奔竄復據桂良奏稱該逆向東南西南竄逸是
賊匪顯係分股潰竄我兵正當乘其喘息未定四面兜擊庶可聚
而殲旃若徒事尾追勢必節節落後勦辦終難得手我兵馬隊最
利追勦著僧格林沁勝保迅卽探明賊蹤派撥精兵繞赴賊前截
擊務期前後夾攻盡殲醜類其首逆各犯尤不可令其乘間免脫
並飛咨張亮基於山東直隸交界地方嚴密堵截以遏賊衝此次
賊匪係由小禮文地方竄出防卡官兵何以任令奔突不能堵截
著該大臣等查明參奏儻有畏葸逃避情事卽著以軍法從事毋
稍寬貸賊眾志在奔突必須盡力窮追據奏河橋爲賊燒斷我兵

繞至臧家橋地方已屬落後以致賊得竄入獻縣又因我兵連夜
跟追暫令少休恐賊匪乘間遠颺見在僧格林沁業已先督馬隊
追擊何以勝保僅尾督後隊繼進前此賊由獨流竄出經僧格林
沁痛加剿洗勝保耽延數日始行趕到此次若復稍有遷延罪將
誰諉刻下賊蹤是否分股奔竄該大臣是否分路追擊各路帶兵
大員如何兜截前後策應著卽迅速具奏正在寄諭間復據僧格
林沁勝保等奏逆匪由獻縣南門竄出我兵追及斃賊千餘名該
逆隨拒隨走至富莊驛村內設伏我兵實難撲進等語逆匪紛竄
追剿尙屬迅速惟據稱富莊驛地方牆垣堅厚我兵俱係馬隊並
無槍礮行軍以火器爲最利見在軍營便捷礮位爲數不少該大
臣等旣跟蹤追剿並不帶槍礮以徒手擊賊有是理乎至逆匪奔
竄後占踞集鎮輒云礮火猛烈不能撲進而我兵轉藉口於無槍

無礮似此遷延遲緩必致貽誤事機且前此逆匪初到東城該大臣等卽以專待礮位爲詞此次又以無礮藉口其誰欺乎若少事耽閤該逆又將築壘空壕負隅死守或乘隙奔突若不西竄卽南撲景州德州一帶皆係水陸要隘我兵又成尾追之勢勦辦何日可了兵貴神速豈可一誤再誤著僧格林沁勝保等迅就見到之兵設法進攻以期埽穴擒渠並飛催後隊官兵星速前進不准片刻遲延若復藉口槍礮未到以致老師糜餉又蹈東城故轍朕惟將該大臣等從重治罪決不寬貸將此由六百里加緊諭令僧格林沁勝保等知之○琦善奏本月初五日總兵瞿騰龍督隊由西岸行至瓜州深入攻勦該逆數千人出拒經官兵擊退殲賊無數詎意賊匪傾巢而出愈聚愈多約有萬餘人分股繞襲我兵之後官兵寡不敵眾瞿騰龍下馬步行揮刀力戰手刃黃衣賊目數名

左右泣勸其上馬突圍誓死不顧衝入賊隊殺賊數十名旋卽遇

害臣查瞿騰龍有膽有識謀勇兼優上年力扼三汊河以少兵當

劇寇每戰身先士卒其忠勇不異雙來茲因力戰被害身受多傷

深堪憫惻又查有甘肅鎮羌營遊擊王禮等均隨瞿騰龍陣亡其

餘傷亡弁兵容臣查明咨部辦理上諭琦善奏進剿瓜州逆臣

連獲勝仗總兵瞿騰龍深入遇害是連日雖獲勝仗豈能償此挫

失見在官兵數逾萬人水路廣艇各船亦不下數十號著琦善督

飭各路帶兵大員設法進剿稍贖前愆斷不准再有延誤至統帶

艇船之總兵葉常春等前因琦善疊次奏稱呼應不靈難以調遣

請嚴飭該總兵等緊扼瓜州斷賊接濟已降旨將葉常春等摘頂

示懲如有不遵調度者卽行正法著琦善仍遵前旨嚴飭軍營將

弁兵勇水陸夾擊迅速將瓜州逆匪盡數殄滅毋誤事機將此由

六百里加緊諭令知之○台湧奏查見在偏近德安各路賊匪雖

已被剿退竄難保不窺伺北向之路臣已飭董玉龍帶所收集之

兵仍由東路孝感縣之三汊鋪前進吳登龍等帶所收集之兵仍

由中路長江埠一帶前進復派福成帶所收集之兵由西路應城

縣前進均飭步步相機接捕竄匪次第偪赴漢陽漢口後路堵紮

既圖應援省城亦可藉遏北竄至應山縣之武勝關一帶實爲入

豫咽喉防範尤關緊要臣前調之提標各營官兵五百名見已陸

續催齊一面飭都司葉永泰統帶馳赴該處聯絡河南派防官兵

扼要布置貴州提臣佈克慎由麻城收集貴州各營潰兵來至德

安自願奮力剿賊臣已商令前往孝感縣屬之楊店堵紮就近督

飭董玉龍等相機進剿曾國藩奏臣於正月二十八日自衡啟程

湘潭分造之船尚未盡畢臣到潭晝夜督辦到長沙時支運軍械

鉛藥守催數日卽行馳赴下游臣所辦之船挖罟一號快蟹四十

號長龍五十號三板艇一百五十號又改造釣鉤船一百二十號

雇載輜重船一百餘號所配之礮借用廣西者一百五十位廣東

購辦者去年解到八十位今年解到二百四十位本省提用者一

百餘位所募之勇陸路五千餘人水師五千陸路各營編列字號

五百人爲大營不滿五百者爲小營水路分爲十營前後左右中

爲五正營正營之外又分五副營統計全軍約一萬七千人至臣

前摺稱待張敬修解礮到楚乃可啟行頃知張敬修爲粵奏畱不

能赴楚續購之礮亦不能遽到下游賊勢急如星火臣更不可少

延上諭台湧奏賊匪分竄德安一帶派兵勦捕孝感應山等處

疊有斬擒並扼要布置各情形當此逆勢猖獗該督必當統籌全

局妥爲布置惟兵力尙屬單弱本日據曾國藩奏已於正月二十

八日督帶礮船自衡州啟程統計全軍約一萬七千餘人曾國藩一人統領重兵朕心實深懸繫台湧統轄兩省責無旁貸所有湖南礮船應如何調撥布置之處著該督與該侍郎和衷籌畫以期迅殄賊氛見在魁玉已帶兵由武昌上援自可酌量調度佈克慎見由麻城帶兵到營著卽飭令該革員前往曾國藩水營隨同管帶礮船稍贖前愆至都司董玉龍等在黃陂一帶收集潰散兵勇分路進剿該督務須嚴飭該員等迅速進攻扼要堵截毋得稍涉遷延再誤事機將此由六百里加緊諭令知之○諭本日據青麀奏稱探聞曾國藩帶勇已距金口百有餘里貴州道員胡林翼隨同前來見復退往上游賊船飄忽上竄急須出其不意順流轟擊該侍郎礮船早入楚北胡林翼何以退守著曾國藩飭知該道迅速前進無稍遲延其應如何相機攻剿之處著隨時知照台湧務

期水陸聲息聯絡合力勦辦勿稍疏虞將此由六百里加緊諭令知之○諭青臚奏連日防守省城情形一摺見在賊船全行上竄武昌情形稍緩魁玉所帶之兵即可令其馳赴荊州以資防勦該學政係奉旨籌辦防堵大員一切應辦事宜自可會同巡撫熟籌妥辦遇有調遣之處地方文武何至呼應不靈乃該學政屢次奏報總以無權之官人未親信爲詞殊不可解台湧已投爲湖廣總督統兵勦賊武昌省城防禦緊要著與崇綸迅速嚴密布置毋得各存意見致誤事機將此由六百里加緊諭令知之○贈江蘇瓜州陣亡湖北鄖陽鎮總兵官瞿騰龍提督予祭葬世職如提督例諡威壯賞其子輔廷廣善廷熊廷豹守備遊擊王禮等均予祭葬世職○癸未台湧奏查湖北全省官兵早已徵調一空更無可調之處所恃者止此收集潰兵爲數不及二千銳氣皆失以之勦除

小股竄匪尙屬可用而欲驅其直擣漢陽未見其可曾國藩所帶舟師猶無抵北信息唐樹義所領礮船前已駛上金口旋經省城調回二十二隻餘船均爲賊奪並有唐樹義陣亡之說四川松潘建昌兩鎮官兵未聞來楚且湖南四川兩路兵來均必由大江以南進勦目下賊氛中阻實恐緩不濟急臣於未奉諭旨之先收集黃州大營潰兵派分三路前進飭其前赴漢陽漢口後路堵紮而將新調提標官兵五百名派赴武勝關與河南派防之官兵聯絡布置卽以嚴防北竄者爲前三路之後應臣一面催令松潘建昌官兵前來一面飛咨湖南撫臣駱秉章迅速撥兵趕緊東征至荆襄等處均隨時諄飭各該文武實力防範並咨會河南撫臣英桂聯絡聲勢其漢陽漢口盤踞賊匪逆燄正張非俟兵力稍厚未可貿然攻勦堵城之敗覆轍可鑒查該處距黃州府城二十五里濱

江臨壑三面皆水大營十一座排比屯紮已犯兵家之忌而吳文
鎔滅賊心急催戰甚嚴正月十五日進剿出隊六成之多未能防
賊鈔襲致中詭計吳文鎔臨陣捐軀並無避至靈沙河之事見據
應城縣知縣翁吉士稟稱吳文鎔身死已在堵城覓獲此外文武
尚未詳查臣外審賊情內度兵力不能不量敵後進未便稍涉鹵
莽駱秉章奏據貴州委員黃鳳稟正月二十三日粵逆上竄金口
臬司唐樹義督帶水勇開礮擊沈賊船十餘隻斃賊無數並砍斃
紅衣賊目二名繼因眾寡不敵船被擊破該臬司落江身死查漢
口上通荆襄爲南北往來要地又與湖南岳常澧等府州屬路路
可通而岳州爲湖南門戶雖已派有兵勇在彼堵禦究恐兵力單
薄查曾國藩於正月二十八日自衡啟程赴鄂須由岳州經過臣
已咨商曾國藩先撥兵勇數千趕赴岳州一帶迎擊以剿爲堵並

請飭下四川河南督撫臣一體迅撥兵勇合力堵剿防其北竄再
湖北臬司唐樹義帶勇剿賊落水身死殊堪矜憫相應請旨從優
賜卹 上諭內閣湖廣總督吳文鎔歷任封圻均能盡心職守自
調任湖廣卽值逆匪復擾武昌漢陽當經督率官兵擊退迨該逆
竄踞黃州吳文鎔出省迎剿先經獲有勝仗正月十五日以力攻
堵城中賊詭計連營被燒遂致陣亡據台湧奏該督滅賊心急催
戰甚嚴因而失事吳文鎔此次督兵失利本屬罪有應得念其臨
陣捐軀不虧大節殊堪矜憫吳文鎔著照總督陣亡例從優議卹
任內一切處分悉予開復應得卹典該衙門查例具奏二品頂帶
湖北臬司唐樹義督帶水勇礮船趕赴金口扼賊上竄疊次襲擊
獲勝旋因賊船蟻集極力督戰被賊將船隻擊破落水身死亦堪
憫惻唐樹義著加恩開復革職處分照臬司例賜卹尋均予祭葬

世職吳文鎔諡文節○諭軍機大臣等見在逆匪亡命狂奔賊蹤靡定後路之防尤關緊要著載齡卽飭各路弁兵分投確探隨時速奏其固安東安黃村涿州通州蘆溝橋等處防堵各營仍著該侍郎嚴飭各該帶兵員弁加意嚴防不得因逆氛漸遠稍存大意將此由六百里諭令知之○諭駱秉章奏湖南庫款支絀請飭川廣督撫協濟軍需一摺見在漢口賊船紛紛上竄楚北軍情甚爲緊急曾國藩督帶兵勇船礮已由湖南衡州駛赴下游會剿所需軍餉甚鉅自應先事豫籌該省歷年防剿需用浩繁司庫所存銀兩爲數無多不敷支發著裕瑞葉名琛柏貴接奉此旨卽迅速妥籌無論該省何款項下有可動支者立卽設法籌撥派委妥員飛速解交楚省斷不准稍有推諉見在湖北情形萬分喫重該省官兵不敷分撥急須曾國藩所帶礮船藉資剿賊之用該督撫等務

當不分畛域趕緊接濟無誤要需將此由六百里各諭令知之○
諭自逆匪竄擾以來長江數千里任賊往來遊駛見在金陵未克
廬州復陷而同竄武昌之賊分股駛赴漢陽金口一帶逆蹤飄忽
非亟籌肅清江面之計不能奏功曾國藩由湖南統帶舟師順流
迎擊業於正月二十八日啟程計期應可行抵楚北上年八月間
張芾有飭令夏廷樾修造船筏之奏此項戰船爲數若干停泊何
處卽著陳啟邁飭知陸元烺揀派諳習軍務及熟悉水師得力員
弁配齊軍火礮位星速管帶駛出九江擇扼要之區截賊往來之
路與曾國藩聲勢聯絡上下夾擊非但遏賊分竄南昌且使皖楚
分擾之賊首尾不能相顧庶剿辦可期得力該撫等惟當妥速籌
辦不准遷延迂緩致誤事機陳啟邁著卽兼程前赴新任其未到
任以前卽著陸元烺趕緊籌辦勿稍遲延將此由六百里諭知陳

啟邁並傳諭陸元烺知之○以重與鹿鳴宴賞前任協辦大學士

吏部尙書湯金釗太子太保前任兵部尙書特登額太子少保均

賜

御書扁額○

以何彤雲爲內閣學士

由翰林院侍讀學士遷

齊承彥爲

左副都御史

由太僕寺卿遷

○甲申諭軍機大臣等據青麐奏武昌被圍

已久請飭川陝河南撥兵撥餉一摺覽奏均係棘手情形並無籌

辦之策該學政係防堵大員屢次總以呼應不靈爲說前次寄諭

內業經嚴斥見在賊船陸續上竄荊州情形亦甚喫重而孝感應

山等處皆有賊匪肆擾賊船盤踞江面台湧所帶官兵無多亦豈

能飛渡竟置北岸於不顧省城防兵共有六千江面礮船亦尙有

二千餘隻昨據崇綸青麐奏報攻勦情形尙云擊沈賊船多隻而

青麐則總稱地利人心兩不足恃且崇綸奏報均與青麐聯銜而

青麐則單銜具奏並云崇綸不及會銜豈有同在一城防守竟至

隔閡如是值此危急之時兩人各存意見必致誤事河南地面緊接江北前諭英桂飭總兵柏山越境協剿自爲德安襄陽一帶喫重剿楚省之逆匪卽固河南之藩籬斷不能令繞越赴鄂爲該撫等株守省城之用四川松潘等處官兵由荊州下駛較爲便捷本日已諭知裕瑞迅速飛催諒可計日趕到陝西調兵已多卽由商雒一帶派兵出境仍在大江以北亦屬緩不濟急該學政昧於事機不知輕重該撫復一籌莫展徒事牴牾豈江北各府非該撫等所轄耶至摺內所陳明言賊在漢陽陸續上竄忽又言武昌被圍旣言曾國藩於正月杪可以啟程而青麇正月二十八日所發之報又稱曾國藩已距金口不遠其偵探之不確已可概見崇綸前此請飭吳文鎔出省剿賊逮朕嚴諭吳文鎔前赴黃州該撫又稱省城緊要請令暫畱似此毫無定見卽知省城布置亦未必確有

把握見在台湧已投爲湖廣總督亟應先將江北逆匪剿除以杜北竄該撫等但當協力和衷固守省垣不得徒以無可籌辦藉詞爲他日卸罪地步總之德安一帶賊匪盡除則漢口逆匪自不敢徑攻武昌而川兵直抵荊襄曾國藩亦順流下駛會同夾擊尙可得手朕於軍行緩急慎重權衡並非重北輕南不爲湖北省垣計也將此由六百里加緊各諭令知之○諭連日據台湧崇綸青麐奏賊船回竄武昌紛紛駛擾漢陽金口一帶並探聞岳州復有賊踪停泊節經諭令台湧由德安督兵進剿兼扼荊襄要隘並據曾國藩奏報於正月杪統帶船礮水勇馳赴下游迎頭截擊惟賊蹤剽疾尤應防其乘虛分竄所有陝省界連湖北之商雒一帶均須一體設防扼要堵剿桂明見駐潼關著卽嚴飭帶兵員弁實力巡防隨時與楚省知照聯絡聲勢互爲應援毋任匪蹤闖入並著王

慶雲督飭各該地方文武嚴密防守邊境勿稍疏失將此由六百里加緊各諭令知之○諭據台湧崇綸青麐奏賊船由武昌漢陽上竄金口荆襄情形喫重兵餉兩缺亟待應援等語前經裕瑞派令署總兵雙保總兵福忻統帶官兵二千餘名馳赴湖北巴東利川各要隘分撥防禦見在賊勢猖獗台湧嚴扼北路恐該匪沿江上竄一經滋蔓剿辦愈難著裕瑞飛飭雙保福忻迅卽帶兵前進迎頭截擊一面知會台湧應向何路分派援應相機妥辦並著裕瑞派員確探楚境賊情如應添兵接應卽著於各路防兵內酌量緩急調撥前往攻剿毋得株守一隅致誤事機仍嚴飭界連楚省各文武隨時嚴密防範無任匪蹤闌入所有軍行器械火藥錢糧並著該督妥籌源源接濟將此由六百里加緊諭令知之○乙酉諭軍機大臣等袁甲三奏皖省逆匪由六安正陽竄至蒙城永城

復由永城竄擾西北該處路通徐州碭山河南夏邑等縣賊蹤飄忽靡定並聞後路之賊復有分赴亳永之說逆匪由皖省陸續竄擾亳永一帶顯係意圖北竄與直隸逆匪互相勾結本日已諭令和春福濟撥兵堵剿並諭英桂扼要嚴防矣惟河南兵力甚單不敷剿辦朕權其緩急若俟直隸軍務告竣始行撥兵前往應援恐有貽誤著僧格林沁勝保迅撥馬步精兵一千名揀派得力大員管帶星夜馳赴河南歸德一帶探明賊蹤所向迎頭截擊會同英桂剿辦斷不准令皖匪闖入豫境蔓延爲患河南防兵並准此次派往大員酌量調撥惟所派之員必須慎重遴選庶可獨當一面足資防範該大臣等見帶各兵已有數萬諒已足敷追剿京旗各營兵調赴大營者爲數不少勢難再行分撥惟該大臣等追剿逆匪正在喫緊之際儻必須撥兵協剿卽著迅速奏明辦理又據桂

良奏署都司陳毅協同署獻縣知縣羅錦雯拏獲賊目據同獲之賊指認爲逆首林淵詳見已解赴大營著僧格林沁等審明該犯如實係林逆迅卽派員安速解京毋稍疏虞正在寄諭閒據僧格林沁勝保等奏追剿逆匪屢戰屢勝一摺逆匪亡命狂奔我兵追剿尙屬迅速惟逆匪竄踞阜城縣城分踞村莊爲犄角之勢若不乘此聲威奮力進擊恐該逆復築壘竄踞死守或乘間竄逸又致蔓延爲患見在皖楚賊氛已偪豫境較前此情形更爲緊急是以令該大臣等分兵往援尙恐一千名不敷剿辦若此股賊匪不能剋日殄滅致令大兵爲所牽掣遲延貽誤之罪更將何辭張亮基見帶兵勇馳赴景州以北正可前後夾擊使逆匪腹背受敵自不難迅就掃除也將此由六百里加緊諭令知之○諭袁甲三奏逆匪由蒙城分竄請飭南北兩路截擊一摺徐廣縉牛鑑所帶

兵勇由歸德陳州出境迎勦尙恐未能得力刻下廬州派來之兵如尙未到著卽派員迎提飛催來營以資防勦參將劉玉豹所帶山東官兵一千餘名亦可就近調遣確探賊蹤迎頭截擊毋令逆匪勾結爲要並著隨時知會和春福濟英桂等以期聲勢聯絡併力勦辦庶可迅掃賊氛皖省兵餉屢經飭令籌撥著與和春福濟商酌通融協濟近日籌餉甚艱仍須加意撙節或體察地方情形應如何設法勸捐籌辦無論銀錢米石皆可濟用該給事中所奏速撥大餉豈尙未悉見在籌撥情形耶將此由六百里加緊諭令知之○諭桂良奏探聞大兵追勦賊匪情形並拏獲賊目一摺賊匪竄入直境僧格林沁勝保統兵堵勦桂良及署提督張殿元鎮守省城藉資捍衛見在賊匪由富莊驛南竄阜城僧格林沁等跟蹤追捕後路尤關緊要逆匪聲東擊西是其慣技見雖逃竄東南

距省較遠亦難保不分股乘間又圖他竄該督務當察看情形相機堵禦或自行出省防守或令署提督張殿元帶兵擇要駐紮必須悉心籌畫斷不可株守省城致有貽誤至署都司陳毅等拏獲賊目均指認爲逆首林瀾詳著卽派員解赴大營毋得稍有疏虞將此由六百里加緊諭令知之○諭據袁甲三奏逆匪大股陸續由蒙城西北竄往亳州永城又有由永城他竄之說是歸德適當其衝袁甲三跟追至宿未能繞出賊前碭山夏邑一帶處處宜防雖歸德有徐廣緒所帶兵勇牛鑑亦馳赴陳州但兵力尙單恐未足遏其兇燄英桂前奏暫駐汝郡原爲楚北賊氛逼近該撫居中駐紮以爲各地應援見在楚省逆賊雖盤踞漢陽竄擾沿江地面而皖省之賊已入豫境英桂統轄全省自當相度緩急扼要嚴守切不可顧此失彼致有疏虞本日諭令僧格林沁勝保迅撥精兵

一千名遴派得力大員管帶剋期前往河南與英桂會同堵剿其河南各路將弁兵勇及柏山所帶官兵均准此次派往大員相機調撥至省城並河北各屬距賊雖遠亦應嚴密設防著卽責令藩司鄭敦謹妥爲布置英桂務當確探賊蹤實力堵禦並將近日軍情迅速奏聞將此由六百里加緊諭知英桂並傳諭鄭敦謹知之○諭前因鳳潁一帶土匪肆擾當經諭令於廬州大營內撥兵一二千名交袁甲三統帶進剿見在河間束城逆匪南竄阜城疊經大兵痛剿餘匪仍恐分竄而皖省逆匪又由永城竄往西北儻南北兩股乘間勾結剿辦更形棘手且恐與廬州之賊潛通消息前調之兵如已啟程卽飛催前進交袁甲三調遣以期迅殄賊氛昨據該提督等奏賊匪撲營督兵擊退大獲勝仗吉順薩炳阿金玉貴等帶領各路官兵甚屬得力又據向榮奏已飭令秦定三渡江

赴皖著卽乘此聲威迅速進剿並設法斷賊往來句結之路隨時
確探賊情勿墮奸計將此由六百里加緊諭令知之○命前任江
甯將軍托明阿仍幫辦僧格林沁勝保軍務○僧格林沁勝保奏
逆匪竄入富莊驛恐被我兵兜剿分其前隊千餘名竄入阜城臣
勝保督帶馬隊千名星夜馳抵阜城鈔擊臣僧格林沁密派官兵
在富莊驛迤南設伏該逆於十二日寅刻向南潰竄臣僧格林沁
帶兵追剿斃賊八百餘名該逆隨分兩翼鈔襲我兵衝入賊隊復
斃賊七百餘名是日約斃賊一千六百餘名生擒三百餘名臣勝
保繼至復督馬隊官兵迎擊斃賊數百名該逆另出一股接應經
臣勝保派令營總那爾胡善等帶兵殺退斃賊數十名該逆竄入
阜城及附近各村臣僧格林沁派侍郎瑞麟等在北面屯紮十三
日丑刻帶領馬隊官兵由閒道繞至阜城迤南將西南之高家莊

宋家莊二處攻破一面接殺一面燒毀房屋隨進至後康莊有逆
匪六百餘名盤踞欲與城內賊眾爲犄角之勢當飭西凌阿等帶
領步隊官兵攻撲經文岱首先攻進樹柵參領關福等拔毀木壘
官兵一擁前進該逆見我兵攻入村內手足失措我兵刀矛並進
斃賊三百餘名逃出村外百餘名經馬隊官兵盡行殄滅匿入樓
房二百餘名我兵四面放火立時燒斃其西北黨村亦經賊踞臣
勝保督兵攻擊斃賊百餘名經文岱親督官兵撲入賊壘殺賊多
名可否開復原官賞還翎頂之處出自 聖裁奏入僧格林沁勝
保得旨賞賚經文岱開復原官○丙戌諭內閣喀爾喀扎薩克親
王車林多爾濟願捐銀一千兩以備軍需自係忠悃出於至誠甚
屬可嘉惟此項銀兩該王藉資養贍著毋庸賞收以示朕嘉獎蒙
古之餘猶寓矜恤臣僕之至意○駱秉章鮑起豹奏接岳州府賈

亨晉稟稱二十八日逆船仍在漢口金口停泊勾引通山通城等處土匪有擾及崇陽之說該郡居民搬徙一空又探稱初一日午刻賊船竄至岳州城陵磯賈亨晉會營上城守禦詎賊匪已到城外愈聚愈多兵勇眾寡不敵賊匪已入西門見在賊由岳州上竄湘陰縣城外查湘陰縣離省百里一水可通連日北風大作舟行甚速省城爲根本重地亟須先事豫防臣等一面飭委將備帶兵在城廂內外駐紮惟城外兵勇尙屬不敷聞曾國藩已抵湘潭臣等復節次咨催該侍郎迅帶練勇來省會商迎勦岳州府城文武員弁下落容俟查明另辦臣駱秉章臣鮑起豹均有地方之責未能先事防範請旨交部議處上諭軍機大臣等駱秉章鮑起豹奏稱探聞逆船在漢口金口勾引通山等處土匪擾及崇陽本月初一日賊船已到岳州城外闖入西門並聞該逆分水陸兩路由

岳州上竄湘陰各等語覽奏曷勝憤懣賊匪已竄至湘陰距省甚近急應派撥將弁兵勇前往堵剿省城防守最爲喫緊曾國藩旣已行抵湘潭著該侍郎迅速統帶礮船練勇馳赴省垣會同進剿勿稍遲延前據該撫等奏岳州爲水陸交衝陸續派撥兵勇一千餘名交該府賈亨晉及參將烏拉哩統帶駐紮並咨江西令將南省派往兵勇五千八百餘名酌量撤回何以賊至岳州並無兵勇遽令賊匪闖入其出省勦辦土匪之署參將塔齊布並江西撤回之兵勇此時是否均已趕到著駱秉章卽速催調妥爲布置保衛省垣鮑起豹節制全省軍務見在賊蹤已近著與該撫酌量緩急相機迎剿務須扼要攻擊不得徒事株守致誤事機岳州失守文武員弁下落迅卽查明奏聞至荊襄一帶與湖南接壤地方是否有另股賊船駛往滋擾並著隨時確探具奏將此由六百里加緊

各諭令知之○張亮基奏查本月初二日委員陳韜等在直東邊界截獲逆匪王小湧劉瀾彩二名據王小湧供稱上年九月間投入賊營逆首林瀾詳因其兇悍用爲親軍十一月二十三日羣逆攻撲官兵營盤該犯用長矛刺殺都統佟鑑見知縣謝子澄前往趨救該犯即在陣前大喝活捉天津謝知縣羣賊蠢擁向前槍礮齊施旋聞謝知縣已死羣賊憚其威名互相慶賀劉瀾彩供稱屢與官兵接仗亦爲林逆信用是該二犯確係賊營遣出緊要頭目無疑查謝子澄忠勇素著聞其陣亡遠近軍民無不同聲痛憤今兇渠就擒應卽解往天津寸磔致祭惟由德州至津必經河間恐致疏虞臣於審明後將該犯等正法並摘去王逆之心在德州城外爲都統佟鑑天津縣知縣謝子澄設位遙祭以慰忠魂而快眾憤得旨佟鑑奮勇捐軀深堪憫惻謝子澄素得民心效死疆場今

既獲逆犯王小湧其爲戕官逆犯無疑已經摘心遙祭洵足以快人心著該旗傳知佟鑑家屬俾伊家自行告祭以慰忠魂並著該部亦傳知謝子澄家屬○丁亥諭內閣前任安徽巡撫江忠源因廬州被陷臨陣捐軀當經降旨追贈總督建立專祠並准其入祀昭忠祠以示優卹復將伊弟江忠濟江忠濬先後分別加恩以知府知州用因念江忠源身經百戰力守危城厥功甚偉卒以外援不力效命行間每憶孤忠時深矜惻其靈柩厝籍時著福濟和春派委委員護送出境並著沿途地方文武各官妥爲照料用示朕垂念忠藎之意○僧格林沁勝保奏臣等查阜城縣西北之堆村連村杜家場三處地勢平坦攻勦可以得手十五日卯刻親督達洪阿等各帶官兵同時進攻兩村逆匪俱由牆孔施放連環槍礮我兵奮勇齊進切近賊柵由兩村撲出逆匪一千餘名欲鈔我兵

之後臣僧格林沁當令馬隊官兵奮力截擊一面仍飭步隊官兵極力攻撲將堆村連村屋上賊匪盡行殺斃村內逆匪並無一名走脫總兵孔廣順等攻擊杜家場臣勝保策馬指揮我兵先用草束火藥然燒鹿角柵連殺賊匪二百餘名該逆卽由南面撲出五六百名經那爾胡善等追殺全數剿滅旋由堆村連村擁出逆匪一千餘名經馬隊官兵在村外圍擊臣僧格林沁飭貝勒拉木棍布札布等將馬隊官兵壓下逆眾向東飛奔欲進阜城西門我兵緊追斃賊五六百名城內擁出逆匪三四百名直撲我兵接應敗賊臣勝保與臣僧格林沁合兵一處復又斃賊三四百名該逆狂奔入城此次兵勇追剿逆匪斬獲甚多立破賊巢三處尤屬奮勇出力當卽賞給兵勇銀一萬兩至該逆狡猾異常其蕝事之期不敢豫定然賊匪屢受懲創斷難蔓延北竄之虞似可無慮 上諭

軍機大臣等該逆經此次痛剿存城賊黨無多必當乘勝將縣城攻克生擒首逆埽蕩羣醜方爲妥善不得因其勢已窮蹙不至北竄遂謂可以無慮儻稍涉鬆懈任該逆窵壕築壘爲負隅之計或又乘間奔突不但西向武邑南向景州蔓延爲患卽東濱運河亦防其復行掠船偷渡官兵分投追剿又落後著惟有乘其蟻聚城中一鼓殲擒毋畱餘孽況皖境賊匪大股已由蒙城亳州竄入河南永城而徐州蕭縣黃家口地方又有土匪爲賊嚮導並有將擾徐州之謠是皖城北竄情形萬分緊急前諭該大臣等派大員帶兵一千名前往歸德一帶諒已遵旨趕緊派往然該處兵力卽有此千名亦恐不敷該大臣等不速將阜城之賊悉數埽除儻永亳等處逆賊分路衝突南北句結又將何以禦之惟盼北路得勝勁兵前往截擊庶足以遏兇鋒該大臣等豈不知朕日夜焦急渴望

捷音猶以蕨事尙難剋期爲詞若不趕緊殄滅羣醜更將何顏對朕耶德勒克色楞見在何處駐紮何以兩次奏報並未見其帶兵攻剿著遇便覆奏將此由六百里加緊各諭令知之○諭百勝等奏皖省逆匪分竄豫境並擾及徐州邊界見籌防剿一摺該匪由潁上蒙城分竄永城並擾夏邑其地由蕭碭分道路徑紛歧距徐州甚近該處僅有大同兵九百名練勇千名兵力單弱該總兵等見飭地方官實力團練自應如此辦理另片奏蕭縣黃家口地方土匪肆行焚掠難保非逆賊勾通令其先爲嚮導百勝見駐徐城儻附近之處何路有警卽著統兵趕緊迎擊並飭王夢齡帶領練勇策應於各處要隘令地方文武嚴密設防萬不可令匪蹤闖入至東豫交界之處已疊諭張亮基英桂分路嚴防又諭令僧格林沁等迅撥精兵一千名赴歸德一帶協剿該總兵等務當與和春

福濟袁甲三等並隨時知照山東河南巡撫聯絡聲勢併力防剿
爲要將此由六百里加緊傳諭知之○琦善奏請撥軍餉得旨揚
州與別處同是軍營甘苦不均豈能復責其拌死疆場況琦善營
缺餉日久非他營可比著戶部再爲籌畫若仍前指款改撥或復
請飭下妥籌俱屬畫餅非濟急之策設使部臣出外視師身歷其
艱亦必知非易易也○僧格林沁等奏報進攻阜城賊匪獲勝情
形得旨十五日之仗斬獲甚多但縣城未復終恐思竄著趕緊殲
除勿畱餘孽僧格林沁等必知朕渴盼捷音之速至也○予安徽
繁昌陣亡知縣張廷槐祭葬世職如知府例建祠○戊子諭軍機
大臣等連日疊諭僧格林沁勝保迅派大員帶兵一千名馳赴河
南歸德一帶截剿尙未據該大臣等覆奏逆匪既陷永城復擾夏
邑該處情形萬分緊急徐州蕭碭地方復有土匪肆行搶掠爲賊

嚮導亦須撥兵援應朕思阜城勦辦賊匪正在喫緊之際前諭派兵一千名前赴歸德是否可以抽撥軍情緩急難以懸揣該大臣等兩次將竄匪勦洗若能於數日內攻克阜城殲除逆匪便可移兵乘勢而南此次抽撥之兵卽稍緩數日亦尙不遲若再事遷延致豫境與徐州賊匪分股北竄豈能不派兵往勦著僧格林沁勝保統籌全局以見在賊情而論或急須撥兵前往或於勦滅此股後再以重兵分路南下該大臣等接奉此旨迅速商酌具奏朕畀僧格林沁勝保勦賊重任斷不肯令爾等掣肘爾等亦當仰體朕宵旰焦勞之苦衷也將此由六百里加緊諭令知之○諭疊據琦善奏陳軍餉告匱情形均經批飭戶部速籌惟撥款轉解需時卽使指撥改撥各款如數解到亦僅敷一月之糧此外更無濟急之策因思淮揚淮海淮徐三屬錢糧漕米俱屬維正之供該督撫遠

在江南值此賊氛竄擾展轉催提尙恐鞭長莫及楊以增近在江北卽著飭令該管道府督率所屬認真實力催徵隨時運解琦善軍營俾可源源接濟郭沛霖見署兩淮運司駐紮泰州督銷鹽引所徵鹽課亦可協撥軍需著楊以增督催趕緊銷運以濟軍需並著琦善就近提取應用事竣覈實報銷此時各路軍餉籌撥甚艱惟有先就本地情形設法籌辦以期於事有濟不至遲誤將此由六百里加緊各諭令知之○己丑諭軍機大臣等前有旨諭令僧格林沁勝保派員帶兵一千名赴河南歸德一帶截剿昨因阜城剿賊喫緊復諭該大臣等暫緩抽撥酌商迅奏茲據徐州鎮總兵百勝等奏本月十二日先有土匪竄入蕭縣黃家口焚掠次日突有大股逆匪踵至在豐工以下屯踞南北兩岸各村意圖分道直趨徐城見在存營兵勇勢甚單薄軍火錢糧皆儲城內請派兵救

援各等語徐州爲南北要衝且係糧臺重地斷不可不嚴爲防範
本日已諭令琦善撥兵一二千名援應徐州並令袁甲三由宿州
馳赴該處扼守尙未知能否分撥赴援且均在徐州以南而北路
空虛甚屬可慮著該大臣等仍揀派得力大員帶兵一千名迅速
前往協勤並偵探歸德一帶情形酌量何路緊急卽帶兵由何路
截擊張亮基見在景州一帶崇恩亦隨大營剿賊山東與徐州接
壤關繫緊要該大臣卽就近與張亮基籌酌辦理毋稍延誤阜城
賊匪攻剿情形如何甚爲懸念該大臣等頓兵日久未能速殄賊
氛轉致大兵爲所牽掣勢且貽誤大局罪將誰諉耶將此由六百
里加緊諭令知之○辛卯僧格林沁勝保奏逆匪自被我兵追擊
連日獲勝訊據賊供僞丞相三人日夜哭泣賊眾無不嗟怨臣等
一面解散脅從有投出者卽當分別辦理惟該逆詭詐異常未破

之村已密布鹿角樹柵五六層之多離村一二箭之遠樹柵俱用鐵鎖鉤連我兵未能撲入臣等見催大礮來營極力轟擊使賊不敢久踞查阜城城內房屋無多積水之處十居八九該逆俱在南關東關盤踞並踞有塔兒頭紅葉莊二處如果堅守不出十日之後我兵挖壕工竣大礮亦可調到卽極力進攻以期掃數殄滅臣等目下雖籌畫戰守之計仍須豫防該逆南竄查阜城縣南通景德二州西南通鄭家口東南通連鎮西通武邑鄭家口連鎮地方富庶久爲賊所覬覦儻令竄踞攻剿更形費手見派藩司崇恩仍統原帶山東官兵於鄭家口一帶扼要駐守又王劉村孫家鎮二處爲通連鎮要道已派直隸督標通永天津步隊官兵在彼扼守截其要路至南路景州撫臣張亮基帶兵駐紮惟西路武邑尙未派兵該處地勢平坦便於追剿若賊西竄馬隊緊追截殺無難悉

數殄除

上諭軍機大臣等前因賊竄永城諭令僧格林沁派兵

馳往歸德一帶截擊昨因徐州蕭碭等屬已有賊蹤郡城喫緊復

諭該大臣酌量緩急或徑赴徐州或馳往歸德扼賊北竄本日該

大臣等奏已派善祿帶兵二千五百名前赴劉家口尙係籌辦歸

德一路而張亮基奏報復稱逆賊已由豐工二壩渡河有直撲濟

甯之信是山東情形尤爲緊急兗州一帶平原曠野無險可扼儻

勦辦稍遲必致與徐州歸德之賊聯爲一氣沿河一帶勢若燎原

大局幾不可問已另有寄諭飭令善祿會同張亮基星馳前赴山

東南路迎勦僧格林沁等所派之兵卽著飭令星夜起程毋庸俟

慶祺來營致滋延誤阜城之賊雖經痛勦尙未見實在窮蹙顯係

牽掣我師以待南賊來援該大臣等目覩南路賊情如此猖獗猶

不趕緊進攻先斷根株奏報摺內尙稱儻能擒渠掃穴再行督師

南下如急切未能得手再圖兩全兼顧之策事勢至此猶復游移無準僅以憂憤爲詞於事何濟所有阜城剿賊事宜卽著責成僧格林沁專辦務將該逆設法誘出盡數殲滅不准再請展緩時日勝保卽與僧格林沁商酌督帶馬步精兵進駐德州一帶爲善祿等後路策應該處爲水陸咽喉既可杜南來之賊並可遏阜城賊匪南竄之路與僧格林沁軍營聲勢聯絡勝保接奉此旨卽將如何分兵何日啟程迅速馳奏此係因汝等剿賊遲延以致南賊北犯不能不分兵兩路爲兼顧之計並非令勝保擁兵德州遙爲善祿等聲援儻前路緊急卽須馳往竭力堵剿若令南北賊匪勾結惟勝保是問沿途所需軍餉卽於山東省無論何款內酌提應用所請敕部籌撥見銀之處已飭戶部速籌接濟其截存內帑一項除陸續撥解順天糧臺外見尙存銀一萬兩亦諭知戶部卽日改

解勝保糧臺矣至阜城之賊尙有塔兒頭紅葉莊二處盤踞爲犄角之勢必須剋日攻勦埽除淨盡斷不准再延時日致干重罪經文岱本日謝恩經朕批令隨同勝保前來今勝保前赴德州軍情緊急著毋庸來京陛見經文岱亦卽飭令無庸前來將此由六百里加緊諭令知之○諭張亮基奏逆賊渡河山東危急一摺張亮基親督練勇二千名卽日馳赴南路迎擊著善祿卽將僧格林沁勝保由大營派撥之精兵二千五百名剋日統領啟程與張亮基會合前進務卽探明賊蹤所向何路緊急卽向何路迎頭堵剿嚴扼北竄斷不可任令此股逆匪與阜城之賊聯絡勾結致剿辦更難得手至濟南省城及南路金鄉魚臺一帶並附近豐北各偏僻要隘著善祿張亮基嚴飭各該地方文武員弁一體嚴密籌防毋稍疏失將此由六百里加緊各諭令知之○諭前因皖境賊匪竄

入河南永城夏邑英桂並無奏報到京降旨詢問本日始據英桂奏勦辦光固捻匪獲勝並調兵飭援歸德一摺又片奏患病情形等語英桂久任外省司道大員於地方形勢何處緊要鄰省賊氛何處切近本應早事籌防況簡任巡撫兼管提督全省軍務皆其專責乃株守汝甯於探報楚省賊蹤既未詳確徒以堵禦六安逆匪爲辭竟不知永夏兩縣業被竄擾旬日所報光固勦辦捻匪獲勝見有柏山在彼按捕辦理防堵該撫何以不移營疾向歸陳一帶迅速迎勦賊匪已入境內尙未探明直是形同聾瞶所患肝疾並非急證儘可隨營調養前既未據陳奏見當事勢喫緊之時豈得以精神委頓自占地步前令桂明帶兵一千五百名馳赴歸德昨又諭恆春撥兵一千名赴豫交桂明調遣著英桂檄飭各屬豫備夫馬糧餉俾桂明一路軍需不至缺乏可期星速進行並著飛

咨恆春提催澤潞官兵趕緊來援仍通籌河南全省大局何處防
兵可以移緩就急卽調至歸德陳州一帶節節接應一面嚴飭省
城文武大員慎密防守以固根本見在湖北賊船已由金口上竄
岳州直趨湘陰其剽襲上游未據報有賊蹤仍當飭令柏山隨時
確探盡力防範近日該撫奏事遲緩甚至各路軍營及他省督撫
報到數日而英桂於本省軍情與賊勢猖獗尙未探明詳奏豈空
言寢食俱廢便能了事耶桂明未到之前徐廣縉能否堵禦所派
赴援官兵七百名是否足資剿辦見在如何籌畫布置卽著詳細
速奏儘稍事遷延致賊匪更竄他處惟英桂是問將此由六百里
加緊諭令知之○命協辦大學士尙書賈楨侍郎常志李鈞副都
統基溥敬修 天壇 地壇 先農壇工程○癸巳諭內閣柏俊
惠壽奏查明書元前奏將軍衙門設立識局等語盛京旗民命盜

案件乾隆年間屢次奏定章程均歸刑部辦理自應循照舊章恪
遵勿替將軍衙門審辦案件自有專司何得設添獄局致滋流弊
嗣後命盜重案及應擬軍流徒罪各犯俱仍照例歸刑部審辦其
例應會同將軍審辦者亦著由刑部主稿將軍衙門不准另立獄
局添設刑具卽寄監監提各犯亦著備文咨送刑部以昭慎重而
專責成○諭軍機大臣等僧格林沁勝保等奏據張亮基咨稱克
濟一帶喫緊該撫馳回邀截請撥兵扼守德州該大臣等復派魁
福督帶馬隊五百名爲善祿後路應援並選備馬隊二千名如東
豫情形十分喫重勝保卽分督官兵親往迎剿各等語此時阜城
賊匪尚未掃除淨盡而南賊復行北犯事勢至此急宜迅速剿辦
斷不能稍寬時日再事游移勝保著仍遵前旨卽日帶兵進駐德
州一帶相機迎剿不准稍有遷延魁福所帶吉林馬隊五百名卽

飭令歸善祿軍營併力迎擊副將邱聯恩移紮景州務須嚴飭扼
守遏賊南奔阜城附近村莊據稱地方狹小較易合圍見已挖壕
樹柵杜賊竄路著僧格林沁激勵將士設法進攻務期及早克復
縣城盡殲醜類爲移兵南下之舉庶免顧此失彼以圖全局儻勦
辦稍遲致令南賊來援朕惟僧格林沁是問至勝保善祿魁福均
已督兵馳往前路勦賊德勒克色楞又患瘡疾此時阜城賊匪急
須殄滅僧格林沁統領全軍責無旁貸務當督飭各路帶兵大員
加意嚴防若復蹈前轍致令賊匪乘間竄逸又滋他患該大臣豈
能當此重罪耶將此由六百里加緊諭令知之○甲午諭內閣百
勝王夢齡奏豐工下游包家樓一帶見有土匪假充逆賊紮筏渡
河該鎮等未能杜其偷竄均屬罪有應得除准徐道王夢齡前經
革職暫畱本任外徐州鎮總兵百勝著卽革職仍畱本任與王夢

齡督帶兵勇迅將股匪剿捕淨盡毋再疏虞致干重罪江南河道
總督楊以增未能先事籌防並著交部議處○諭曾國藩奏已故
巡撫之孫捐輸軍餉請將伊祖入祀鄉賢祠一摺所奏荒謬之至
原任湖北巡撫楊健道光年間因隨聲附和年力就衰奉 旨降
爲三品頂帶休致其非德望素優已可概見嗣因該地方官題請
入祀鄉賢經部議奏駁奉 旨允准茲據曾國藩奏稱楊健之孫
候選員外郎楊江捐輸軍餉銀二萬兩率請將楊健入祀鄉賢祠
實屬袒護同鄉以私廢公顯背 聖旨可惡已極各省題請鄉賢
例由督撫學政覈其事實具題曾國藩以在籍侍郎輒敢專擅入
奏並請特旨允准毋庸交部是必欲朕俯如所請迹近要求朕知
該侍郎斷不敢故意違 旨總因見解未充遇事拘泥復過於好
名所致甚至飾詞巧辯有名宦以吏治爲衡鄉賢以輿論爲斷之

語竟似從祀鄉賢不必問其平日居官若何所奏更不成話曾國藩著交部議處其楊江所捐銀兩應得獎敘之處仍著該部覈議具奏○諭軍機大臣等袁甲三奏賊到豐工下游之包家樓紮筏渡河賊蹤飄忽萬難追及卽時折回宿州嚴堵南路續來竄匪並稱此股逆匪分爲三起接連而行意在接應河間之賊各等語見在徐州雖保無虞糧臺重地必應嚴爲防範百勝等所帶兵勇爲數無多深恐難資堵禦前有旨令袁甲三趕緊赴援移緩就急以遏賊匪北竄豈不知權其輕重以顧大局轉以徐州鎮道兵勇足敷勦辦爲詞希圖卸責又以賊已渡河追勦不及藉口折回僕僕在道總未見賊豈不知愧恨耶袁甲三自到皖省以來疊次勦辦土匪尙屬出力及致大股逆匪蜂擁北犯踉蹌趨避朕倚任該給事中不爲不專宜如何竭盡心力以副委任乃止知株守宿州總

未與賊接仗朕實不解況河間竄匪勢雖窮蹙惟欲死守待援既據奸細供稱南北之賊意在援救河間萬一乘虛奔突不惟句結堪虞轉致分我兵力該給事中如趕緊跟追相距亦止兩日安見竟不能及且既稱南路稟報尙無續竄之賊何以徑行折回置北來之賊於不顧本日已諭令百勝等嚴守徐州能否布置得宜朕心實深懸繫該給事中見既折回若再令北來更屬緩不濟急著卽督飭兵勇盡力之所能爲杜截南路竄匪不准稍有疏虞儻再貽誤事機自問當得何罪將此由六百里加緊諭令知之○曾國藩奏貴州黎平府知府胡林翼前經督臣吳文鎔奏調湖北差遣該員自帶練勇六百名由黔赴鄂於正月下旬馳抵金口適值黃州師潰賊艘上竄該員所募黔勇係山民不習水戰不能前進臣擬先遣陸勇與該員會合援鄂又值賊匪竄擾岳州湘陰臣思岳

州一帶既被竄擾自當先攻克岳州不使南北梗塞方能全師東下見擬札飭該員會駐岳州附近地方臣迅卽派員督勇先行會

剿報聞○崇綸丁憂以青巖爲湖北巡撫文清爲禮部右侍郎崇

實爲內閣學士

由通政使遷

○命丁憂湖北巡撫崇綸協辦防剿事宜

○乙未封

貴人那拉氏爲

懿嬪○丙申諭軍機大臣等僧格

林沁勝保等奏查探東豫賊情請暫緩分兵南下一摺如該大臣等所奏果係確情則見在善祿帶兵南下自己足敷剿辦勝保暫緩分兵亦係通籌全局之計惟此股南來之匪究係土匪逆匪仍未可定且卽係土匪亦難保無勾結逆黨先爲嚮導情事朕所以命勝保進駐德州者原因阜城之賊日久未滅慮其與南賊勾連剿辦更形費手是以斟酌再三爲此南北兼籌之策該大臣等身在行間既有此奏自必確有把握原可不必拘泥前旨致誤事機

如果東豫之賊實係皖賊大股業經朕先事豫籌而該大臣等以
大意誤事朕亦不能寬宥至所稱先將此股逆匪殄除再以大兵
全力南注自可迎刃而解究竟此股逆匪何時可以殄滅大兵何
時可以南下朕日夜焦灼迫不能待該大臣等徒事遷延不卽剋
日殲除坐令南北大局爲此垂斃之賊所牽掣豈不更墮逆賊奸
計善祿已馳赴荏平諒已探明南賊確情惟距大營稍遠若事事
由該大臣等轉奏不免耽延著傳知該將軍凡一切進剿機宜及
逆匪情形均准其一面馳奏一面知照該大臣等以期迅速至武
邑防兵據該大臣等奏請移赴大名頃據桂良奏報則稱武邑未
可撤防馬隊仍須撥回並另派副將達年赴大名設防著該大臣
等酌度緩急毋致疏失將此由六百里加緊諭令知之○丁酉諭
軍機大臣等昨據僧格林沁勝保等奏令張殿元帶兵前赴大名

並據桂良奏武邑喫重未可撤防另派副將達年馳往堵禦朕詳加批閱武邑逼近阜城防堵固屬緊要但統籌全局權衡輕重兼顧南北自以大名爲扼要之地見在皖賊由碭山偷渡黃河擾及單縣雖有善祿等馳往迎剿似可遏其北竄之路儻該逆沿河西竄從東明開州等處乘虛窺伺則大名係入直門戶亟應添撥重兵駐守以資堵禦張殿元原帶官兵並僧格林沁等調換之通永宣化步隊各兵著桂良飛飭該署提督迅速帶往扼截至阜城逆匪困守一隅我軍四面兜圍當可指日殲除然亦難保不因被剿情急突圍逃竄桂良職任封圻責無旁貸務當統籌大局督飭文武員弁兵勇勤加偵探實力防剿不得稍有疏失軍情變幻靡常難以臆定該督仍當與僧格林沁勝保善祿等隨時知照酌量緩急妥爲布置不得稍涉大意致誤事機將此由六百里加緊諭令

知之○諭前因逆賊由黃家口包家樓竄渡黃河並有直撲徐州由荆山橋北竄之意當經諭令百勝王夢齡於口岸緊要處所分布扼守想已遵照辦理矣昨據僧格林沁勝保奏稱賊由碭山渡河見踞單縣善祿已督兵馳赴荏平探明迎剿是渡河賊匪已竄至單縣其屯聚包家樓之賊見又竄往何處是否尙在該處占踞近日有無賊匪續行偷渡百勝等作何布置連日未據奏報實深懸繫前此袁甲三奏報該逆自十六日至十八日由包家樓紮筏渡河見在黃家口包家樓兩處仍有土匪占踞且據奏賊匪係分三起陸續北竄其盤踞河岸之土匪既將前股賊眾導送渡河安知續來逆匪又不藉爲嚮導著百勝等卽就見在所帶兵勇一面保守郡城一面竭力堵剿將此股盤踞賊匪剿滅淨盡不得專以保護郡城爲詞任令南來賊匪陸續偷渡致滋蔓延至南路軍情

仍著隨時奏報毋稍延緩將此由六百里加緊傳諭知之○琦善
奏查直隸帶兵官惟參將鞠殿華陷陣衝鋒不避艱險其驍勇善
戰一時罕匹自上年到揚以來戰功屢著此次直隸弁兵紛紛逃
走而提標中營逃兵尙少提臣陳金綬人極醇謹未免過於長厚
其精力雖尙強健亦非復少壯氣體惟該提督尙能虛衷受益不
至意氣用事貽誤事機近日江中賊船往來上下絡繹不絕前獲
奸細供稱由和州前來探聽六合儀徵揚州官兵多寡臣已分飭
沿江各營嚴爲之備又探賊船溯江而上攻擾黃州督臣吳文鎔
退至麻城誠恐武昌兵燹之餘難資控扼廬州賊勢猖獗蒙城一
失將由永城以窺歸德由蕭縣以窺徐州方今決河未塞河身乾
涸可以長驅而過山左兗沂一帶處處戒嚴臣已飛咨和春福濟
與河臣楊以增山東撫臣張亮基給事中臣袁甲三嚴密防堵得

旨所論陳金綬誠爲公當勅殿華在二年夏間推升山西參將引見時朕見其漢仗好箭射有準特旨仍畱直隸不料該員能如是出力雖有逃兵亦難吹毛求疵○戊戌諭軍機大臣等張亮基奏稱賊匪渡河後攻陷豐縣竄近單縣經該營縣等督率兵勇兩次截擊獲勝該匪復於二十一日竄入金鄉縣城該撫見由山路徑赴濟甯善祿由湖北東昌一帶馳赴曹州迎剿各等語見在阜城之賊尙未殄滅淨盡勦辦正在喫緊勝保已暫緩分兵前赴德州僧格林沁等先飭魁福統帶馬隊五百名直赴山東刻下賊匪已竄至金鄉善祿自應督兵迎探賊蹤所向扼要截擊萬不可墮聲東擊西之計致落賊後張亮基亦當探賊所至迎頭截剿與善祿兩路夾攻方可得手若因已派善祿帶兵進剿該撫卽紆道遷延意存觀望貽誤之罪更將誰諉其附近要隘若有須分兵扼堵之

處或令魁福帶兵前往著善祿張亮基酌量布置總須併力兜剿萬不可令賊匪北竄與阜城之賊勾結再致蔓延臬司厲恩官帶兵駐紮宿遷此時賊竄山東徐州亦尚有賊匪踵至或飭令該臬司就近赴援徐州或折回山東防剿著張亮基酌度情形相機調度並著嚴飭地方文武員弁一體嚴密防範毋得再有疏虞將此由六百里加緊各諭令知之○諭台湧奏分派官兵三路剿賊大獲勝仗克復黃陂縣城見籌速剿孝感一帶股匪進攻漢陽等語前據崇綸等奏漢陽逆匪半係烏合長髮老賊爲數無多自不難剋日掃除若稍事遷延致賊勢鴟張更難殲滅該督節制兩省務當統籌全局乘此聲威督率官兵將孝感一帶賊匪迅速殲除一面督兵收復漢陽保衛武昌一面與駱秉章曾國藩迅籌剿辦務將岳州湘陰等處逆匪次第殄除毋得株守德安僅派弁兵接捕

零匪致誤大局荆襄一帶是否有賊上竄仍須督飭文武員弁實力防守本日據英桂奏四川銅斤前經戶部奏明由湖北轉運陸路至河南運京見在尚未行抵豫境等語京局需銅甚急著台湧速飭所屬查明該運員等銅船見抵何處催令星速運至江北陸路由河南轉運萬不可稍有延誤將此由六百里加緊諭令知之○諭據和春福濟奏統帶各路兵勇共二萬四千餘名每月鹽菜口糧馬乾等項需銀十七萬兩請由山陝按月各協解銀八萬兩等語見在廬州情形緊急兵勇需餉甚殷揚州軍營停兵待餉更甚於安徽尤應急行籌畫惟見在部庫告匱京餉尤關緊要山陝兩省捐輸銀兩及地丁鹽務各款必須迅速解京源源接濟而琦善和春等兩營軍餉亦斷難置之不顧著該撫等通盤籌畫每月協濟兩處軍餉若干萬兩迅即奏明由該省徑解揚州廬州兩處

糧臺勿稍遲緩前經戶部奏由山西鹽商捐款內撥解琦善營十五萬兩和春營五萬兩並著恆春迅速派委妥員解往無誤要需將此由六百里加緊各諭令知之○諭前有旨令向榮速飭秦定三酌帶貴州官兵赴廬會剿本日據和春等奏秦定三由江南到營並未帶兵若另撥官兵派令管帶恐兵將隔膜難期得力請將秦定三原帶兵丁仍飭迅速赴廬等語秦定三驍勇素著若無得力之兵歸其調遣又將憑何剿辦況見在賊由蒙亳永城夏邑竄至徐州已諭和春飭令秦定三帶兵赴徐剿賊皖省待兵甚急著向榮仍遵前旨迅將秦定三原帶之貴州等營官兵一千名飭令星馳前赴廬州軍營毋稍遲延至金陵見在籌辦攻剿情形日久未據奏報該大臣等坐擁重兵耽延時日既不能迅速克復又不肯撥兵協剿移緩就急坐視賊匪蔓延是誠何心向榮於接奉此

旨後迅速撥兵赴援仍著設法攻克金陵以贖前愆若徒以兵分將少爲詞遷延觀望罪將誰諉將此由六百里加緊諭令知之○己亥諭軍機大臣等前據僧格林沁等奏通籌剿辦情形當經降旨准令勝保暫緩進駐德州原因該大臣等奏稱先將此股逆匪殄除再以大兵全力南注該大臣等自必胸有成算不至徒託空言但該逆竄擾畿疆已踰五月屢陷城邑久抗王師該大臣等雖疊次斬擒多匪每云賊勢窮蹙何以占踞阜城後復任令堅匿死拒又將兩旬以厚集之兵乘得勝之勢蕞爾小邑豈難攻克卽謂必須計取又豈數日來尚未籌及坐俟城關及塔兒頭等村賊糧食盡後聽其仍前紛竄耶南路賊蹤渡河後攻陷豐縣逼近單縣復於二十一日竄入金鄉逆燄愈張日趨而北善祿張亮基分帶兵勇迎擊而賊情詭譎設由歧途捷徑颺忽疾走與阜城之賊一

經句結彼時該大臣等再議前截後勦辦理更形掣肘不趁此時殄茲窮寇一味遷延玩誤實不解是何意見朕信任僧格林沁勝保所請無不允行不能藉口於朝命之遙制卽僧格林沁勝保二人平日辦事性情各有所偏早在朕鑒之中屢加策勵亟望其同心合力迅奏膚功若各挾己見兩不相下以私廢公坐視貽誤絕不念朕心之焦切民生之疾苦稍有天良不應如此時事至今萬難再寬期限著僧格林沁勝保卽將此股賊匪掃除或可不加罪譴訥庫尼素光刀神雀刀之賜非爲該大臣等飾寵示威似此因循日久糜餉老師律以軍法夫復何辭儻以厯奉嚴旨視爲具文不卽奮迅圖功是該大臣等無福承受朕恩朕亦不復再諭矣懍之將此由六百里加緊諭令知之○諭恆春奏變通借徵辦法等語見在上忙新賦業已開徵所有借徵膳黃著准其暫緩張貼仍

嚴飭各該州縣將本年應徵上忙地丁銀兩實力催徵不准絲毫
禁欠其下忙錢糧亦著設法勸諭提前徵解不必拘泥一二分之
數總以盡力催解爲要至上年下忙錢糧據另摺所奏除蠲緩外
實欠銀數尙有三十四萬五千餘兩山西地方輸納向稱踊躍何
至民欠如此之多總由地方官催徵不力起解不前所致著該撫
嚴飭各該州縣務將上年欠數及本年應徵之項埽數徵完報解
黨有徵收不力及徵存未解情弊卽著嚴行參辦以儆惰徵而濟
要需至鹽務捐免充商銀兩據稱有三百餘萬見僅據該撫報解
銀十五萬兩京餉需用甚急斷難久待著卽嚴飭總局委員催令
各該商等趕緊依限完繳隨時起解毋任延宕此外各屬捐輸軍
餉銀兩見在解司者已有若干恐各州縣擅將捐輸之款侵那抵
用不肯如數報解著該撫飭令署藩司沈兆澐嚴查各屬催令迅

速報解儻有侵那情弊並著據實嚴參將此由四百里諭令知之
○命已革太僕寺少卿徐繼畬督辦山西澤潞遼州防堵事宜○
是月賑江蘇邳州等五州縣被水災民緩徵福建福安等六縣被
水田畝額賦並賑上杭縣災民口糧蠲免雲霄等十七廳州縣被
擾地方額賦緩徵淡水等二十七廳州縣及水口南日等七縣丞
所屬新舊額賦蠲緩河南鄭州等十七州縣被擾村莊上年額賦